

青
芝
山
館
集

青芝山館詩集卷第二十一

臨川 樂 鈞 元淑

古今體詩

壬申

揚州燈市詞十首

消寒第四集

積雪全消雨又晴街頭巷尾踏歌聲今年燈比去年好更說
新城勝舊城

豪華嗟賈勝王侯玉作燈輪鏡作毬還笑阿廢貧薄相如今
處處是迷樓

買得燈歸價莫論家家兒女盼黃昏黃昏未斷燈齊點不到
天明不閉門

百種禽魚四序花流星撒地隱形霞年前辦過鰲山貢分得

餘光照萬家

廿四紅橋徹夜紅
水邊樓閣最玲瓏
不知何處吹簫過
疑有仙人在半空

簇簇衣香染韞塵
花釵媚子插頭新
白日看燈尤好看
看看燈兼看看燈人

火樹銀花掩夕曛
燈光如水蕩簾紋
分明不夜城中住
那管天邊月幾分

月觀風亭久寂寥
只餘燈火開元宵
清淮凍合寒雲重
爭許魚龍趁晚潮

年年燈市趁新年
桂燭蘭膏那值錢
過卻上元增米價
貧家幾竈有炊煙

刻燭詩成酒正醒
兒童喧笑開前庭
背人行過梅花下
獨倚

閒關認客星

明靖南侯黃忠桓公墓

消寒第四集

下馬傾銅斗上馬揮鐵鞭手提髑髏還帳下換得白金償酒
錢少年奇氣便如此從此人稱黃鬪子平生百戰皆無敵崇
禎年間奏奇績封侯已是小朝廷猶爲南都撐半壁南都君
相日追歡堂堂義憤秋霜寒高劉何物與公伍賸水殘山震
金鼓蕪湖營前矢貫喉歸占江干土一抔當日何人同此恨
梅花嶺上有荒邱

錢忠懿王買燈歌

消寒第五集

前宵已罷傳柑醺昨夜冰輪剋一線銅街薄霧掩香塵火樹
餘花落曉箭士女蹋歌三日休帝京佳節誰能畱紅圈帔散
長春殿金字牌收宣德樓錢王富貴兼閒暇百萬金錢買兩

夜綵棚依舊綴星辰珠箔從新噴蘭麝當時納土歸中朝豪
華曾度九元宵勅使捧衣升月殿降王聯轡上星橋風光未
免多振觸豈是爲歡苦不足錦樹應凋故國霜燈山徒費官
家燭自從四鴿飛龍湖虎頭王氣知有無奉貢年年比南越
稱臣世世學東吳珍麗如山頻輦載欲守藩封同五代宰相
都酬瓜子金王妃亦進蘋犀帶汴水東流竟不歸恩禮雖崇
初願違金鳳欲飛情默默銅容不見夢依依幾姓河山成破
壁係族全名眞上策拌將一座奉恩樓換取千間禮賢宅人
生往事總如煙眼前景物皆值錢那惜千金延一刻直須斗
酒醉三年時清可奈身將老買得春宵猶恨少只言歌舞慶
昇平爭識英雄愴懷抱銀燕金鳬事已陳鰲山鳳輦語徒新
廣陵燈市仍消歇愁煞空齋對影人

春餅 消寒第五集

瑤肌十字破春寒佳品應堪列食單
隨意人情同炬敕當筵節物類
牢丸探花未試紅綾餠簇菜先登
白玉槃似此題餅時候勝家家風味
只羊肝

分詠春蔬得韭 消寒第六集

翠散千絲髮黃包一束金煙畦人自剪
雨夜客相尋薦薦廟春如昨登盤歲
又今庾郎貧有味清氣領來淡

紙鳶效韓孟聯句體 消寒第七集

大造迷眞形高空限殫觀野馬遊無蹤
神彫駐何所百族紛翻歧羣飛互邁
迂高下皆自奮靈頑各爲伍有物名紙
鳶從風協金虎厥聲何聃訇無翼竟軒
翥骨節鳴湘筠羽毛刷剡楮韻諧荀鐸
奏氣等彭排鼓市地難迴旋戾天藉吹
响挂礙

防高枝拘牽受弱縷煙絲飄益高雲葉薄堪補疑垂千丈綸
儼發百鈞弩奇自墨翟創巧原魯般祖師意轉輕俊存名變
模矩曾銜洛水書豈飲臺城羽別調高駢知驚才蓋勛許鷹
隼向驚猜鷺鳩敢儔侶掠水匪捎燕過樓詎嚇鼠飄飄翔復
停跼跼墮猶舞仰手漸能接投邨了可數懸燈還亂星灑翻
但愁雨寧能止塵埃渾不畏羅罟幻質遺禽經假名附樂譜
詭製日爭新精思欲勝古輪張蝴蝶翅帶曳驚絲股逍遙跨
鶴賓絳絲乘鸞女蟲或蜂蟬微獸仍師象巨規規肖物形一
一達霄宇繪畫滄青紅權衡較銖黍技笑土牛拙心憐棘猴
苦茅龍比神變石燕妬輕舉晴郊春路寬寒食午天煦張口
看兒童昂頭到行旅馳騁交譁呼低昂每決賭手疲情未闌
線斷氣斯阻操縱終無權升沈就有主藐軀引絙成浮世借

巢處繫日思長繩歌雲感雜組簸弄由鴻濛嬉遊讓僮豎欲
與天公賤寄愁入紫府

春晴曲

消寒弟七集

曉鳥啼紅罷遙山潑翠濃去年花下客今日始相逢
紫陌泥猶軟紅橋水欲波遊人渾未覺只訝落花多
前窗明玉鏡小院曬羅衣無復瀟瀟雨郎今歸不歸
春寒消欲盡始覺日初長燕子歸來晚開簾看夕陽
已消竹外雲更盼柳梢月不敢問清明怕過寒食節

儀徵縣齋十二咏爲屠琴塢明府作

奉爵稱壽之堂

新釀已香陶令秫還丹兼煉葛洪砂親年未老
君恩重消得詩人補白華

五雲廳事

仕宦正如雲出山願爲霖雨到人間蓬萊舊館爭堪憶唱罷

霓裳盡日閒

琴塢由庶常改官

江寒草堂

江雲漠漠釀春陰衙鼓初停月已沈赤岸潮聲聽不徹一簾

香暝坐調琴

佇鶴寮

海上仙禽定有無倚闌東望笑相呼平生幾箇青雲侶取次
來分鶴料符

習射之圃

弓鳴誰血晚風寒莫作投壺賭酒看閒盡太平漁獵手江天
白日看雕盤

琳琅閣

仙字空餐笑蝨魚
插身簿領便迂疎
循良畢竟資儒術
殷浩何曾解讀書

濡墨廊

煙散桐花滿研池
也臨書畫也題詩
不妨日判三千牘
自有揮豪擘楮時

湘靈館

城外有湘靈石欲移未果聊以名館

嗜奇休認米襄陽
移石何曾到上皇
卻把騷心長觸起
月明江上望瀟湘

就竹亭

青鳳翛翛舞翠筠
收來煙露一亭新
風流不數山陰令
去到人家惱主人

雜花小逕

細草迎風偃綠波
輕紅淺紫繡煙蘿
過牆蝴蝶終年有
抵得河陽一縣多

桃塢

分得天台一塢紅
重牆遮斷五更風
黃河三月走新漲
無限落花流向東

南岸青山樓

快閣晚晴閒可倚
南樓秋月醉來登
山圍城郭天圍水
不見金陵見廣陵

琴塢惠所畫山水幀子次題畫韻荅之

吳山曾醉落梅天
重向鑾江話往年
他日展君圖畫看
半成山霧半江煙

丙寅五月余自揚州歸過杭與琴塢及諸同好飲於詩平山寺今七年矣

春寒和琴塢兼示夏慈仲上舍

寶晉

雪意本未艾春風過其威風聲亦太逞霖雨迎其機氣候失
眞宰喧寒無定時積陰午未豁窗月久不輝階前若溟海秉
燭將何之又聞竹樹戰簷馬皆怒馳盆梅如怨女掩袂愁淡
帷天心豈改易歲德分醇疵枯坐我所慣香醪况盈卮以夢
遊廣漠踏雲追六螭此是出世法自然非好奇萬境在寸曾
吾曹當不疑

訓慈仲見贈用宋王逢原遊北山寺詩韻兼呈琴塢
二首

澆愁得酒杯同罄卽事成詩字未安誰戰修羅入滿孔欲呼
顧兔來篁端風聲震瓦客心碎雨氣逼燈人影寒會待春晴
約地主繞城遍索梅花看

生計蕭條輸粟里夢鄉偏仄笑槐安催春我但愁鴟鴞瑞世
君應比角端文字已爭珠月朗肝腸休鬱劍花寒草成日出
扶桑賦定有公卿刮目看

眞州準提庵古梅歌

揚州東閣開未開且向眞州尋古梅日午江空寺門寂紅雲
湧出華嚴臺玲瓏四面落疎影醞釀一氣連枯蘂餘香可醉
萬蜂蝶劫火曾閱千靈雷傳說此梅趙宋物僧耶俗耶誰手
栽玉津艮巒久荒草何獨不作昆明灰得毋閒處物能壽比
似漢柏兼唐槐枝柯十丈盡屈鐵香雪海中無此材我疑癯
仙本幻化游戲偶入花宮來小別蓬山幾日耳人間歲月如
風埃縞袂素娥苦相憶青腰玉女潛邀回四十餘年斷消息
東皇重遣封姨催孤芳不爭草木豔勁骨豈受冰霜摧老佛

無情但微笑色身雖在何有哉如今地主得賢宰謂琴花下
聊可傾尊罍金沙尚輭雨初霽玳瑁正破明珠胎宋代忠臣
祠廟近莫吹玉笛生遙哀

春分日琴塢招同慈仲并攜其長君脩伯遊準提庵
觀古梅還過江邨園泊暮乃歸旣作古梅歌復成長
句

新晴郭外見野草快意有似出籠鳥奇花未對神已交亂夢
繁愁一時埽須臾走入象王宅拔地八龍門牙爪紺珠萬斛
穿纓珞玉蜨幾叢繡襦裸十分香色才一分翻悔尋春猶太
早人生情興豈有極此後風雨誰能保花神閱世七百年幾
人笑口開花前今日伸眉到我輩今日已算人中仙江邨名
園我所熟三度雋遊久不續乾隆乙卯五月九日黃父胡香海
俞半亭江吟香諸君餞余於此

園辛酉甲子與曾實谷方伯及諸賓客凡再至然皆夏日也
接萬竹舊有小梅今正花願君移棧更燒燭日落未落山雲
紅月來不來江水綠一聲老鶴林亭冷瑟瑟遠風吹酒醒遙
聞牧笛隨歸鴉料得僧廊墮繁影適來題句贈玉妃環佩可
曾天上歸過卻人間春一半也應凭檻惜芳菲

壘北山韻畱別慈仲

羸病心兵遇敵怯空虛性筏隨流安天機清妙喜裴迪小事
餽塗師呂端醉後情懷花爛漫貧來意氣竹高寒中年畢竟
輸年少細字經書不耐看

自眞州歸揚州道中作

燕壘營方急狐裘著尚單節憐上已近風比孟春寒雲氣溼
桑柳草香欺杜蘭馬蹄前滑處泥土未曾乾

寒食夜聞風雨聲呈劉芙初史仲仁余時宿題衿館
二君亦同客都轉使廨

鶴記兩番別鴉看萬點來海濤風攪樹山鬼石眠苔寒食猶
冬令孤窗只夜杯隔牆餘舊侶零落似殘梅

三月二日洪桐生太守招同吳穀人祭酒江漪塘民
部貴仲符觀察石琢堂廉鎮汪劍潭太守程澄江侍
御吳香竺大令劉申甫孝廉秦敦夫陳石士劉芙初
三太史古梅花嶺修禊

詩老主勝地招邀及良時古人稌上巳今乃先其期此日是
可惜何爲待來茲天意眷佳會晴光故遲遲先登香遠樓遠
翠來撲眉繼訪史公墓石楠啼子規褒忠得睿藻往事寧足
悲去去遊東園新聲換黃鸝小山鬱古氣屈曲蟠龍螭殘梅

若待客春暮猶戀枝羣賢半老輩乘興相邀嬉幸能奮腰腳
豈顧汗浹肌攬衣竟先上始覺山猶卑西軒啓高齋四座無
停卮藏彊發雅令觴政遞主持酒闌更拇戰燭影紛迷離小
戶飲亦豪要釀胷中詩醉態各閒妙惜無新月窺虹橋跡已
冷韻事固可追四序盡佳節閒人無不宜

節孝墓

春遊第一集

母病入膏肓子情切肺腑身外無良藥割肝救母苦割肝病
良効天報孝子孝母安子竟死胡又爽其報當子割肝時事
惟孝婦知朝烹孝子肝暮撫孝子屍子死母不聞但言兒出
門婦哭姑不知見面無淚痕姑以天年終夫已十年死殉姑
兼殉夫節婦報孝子節婦姓曰俞孝子姓曰蕭名曰其人廣
陵人其事康熙朝墓近梅花嶺雙魂同炯炯雙魂不可見但

見梅花影梅花開滿林節孝同一心慈烏最悲痛日日啼寒陰

上巳穀人祭酒招同芙初竹海許蕙齡孝廉

乃廣何

夢華秀才

元錫

吳香竹大令

文照

沈小棠上舍

錕集

安定書院同用楊鐵崖花游曲韻

欲雨未雨天冥濛絲絲楊柳絲絲風觥船瀉碧春陰裏酒氣
成雲復成水須臾晴開闔闔門斜陽紅射青草裙芳郊昨躡
羣仙步同弔南朝碧血墓

昨謁史閣部墓

寒袞又爲蹋青來花下許

分婪尾杯興酣欲傾竹葉盃手拍闌干當歌板不知眉月東

耶西雪壁照眼模糊題東皇莫遣催花使春色十分賸三四

願得山陰九萬賸人人都賦留春篇

三月九日繼蓮龕觀察招同穀人祭酒劍潭太守芙

初石士兩太史張子澗秀才灤泛舟湖上飲於桃花

庵以桃花潭水深千尺分韻得深字

湖上鷗盟久不尋況教蘿薜對纓簪遊艘少處春波定酒盞

停時暮靄淡明月有情描醉影桃花微笑領詩心高軒歸向

柴門過更遣清歌續短吟是夕蓮龕笑初子澗三君過余

腐廬呼歌童置酒飲至夜分

次日笑初石士受笙仲仁滿舲竹海集余腐齋客散

得句

客散西窗月虛廊跼影行酒懷春水活天路夜雲輕獨笑思

詰語微吟觸遠情鄰家都睡熟誰解聽雞聲

次日穀人祭酒劍潭太守復招同蓮龕笑初石士秋

竹子澗集安定書院庭中桃花盛開紀以長句

薄薄春陰籠午院桃花映微酒人面非關醉眼忽矇矓紅入

夕陽看不見花光已淡酒情濃四座縱橫皆酒龍一斗三杯
各暢意不知已打城樓鐘舉酒勸花花莫笑酒人年老心猶
少花若長開酒不醒古人不讀離騷經

是夜與芙初復飲蓮龕觀察舟中三鼓而返

水月留光待人影水風吹面酒都醒帶醉出城醒入城水風
水月疑無情官舫銀燈剪長穗飛到十觥人復醉休論來日
更如何今宵所得良已多醒醉相尋亦何恨惜哉尚欠花前
歌

題襟館海棠將罷悵然作詩

絳妃欲去尚遲留睡未曾醒嬾下樓萬點飄都成別淚十分
濃早釀春愁仙姿可要藏金屋豔骨須教葬玉鉤不待曉風
吹落盡海山庭院已如秋

十七日石士招同諸公復集安定書院

過客還爲主畱春且莫歸雨酣修竹淨風顫落花稀薄霧明
蛛網斜陽畫蝶衣近來多夜色應是酒星暉

揚州餞春曲和史仲仁

天公十日九風雨盼得春來春已去春當未去已無情日日
飛花復飛絮飛花飛絮亦無多新綠黯黯沈煙蘿長醉長醒
雨無賴再風再雨當如何紅羅襪蹋香泥沅金縷衣鉤叢棘
破游絲裊下短檐來燕子掠從淡院過淮水將春何處流春
歸無路春應愁天上碧桃開也未散仙幾箇在瑤樓

芍藥田歌

消夏第一集

香雲五色繞城郭接畛連畦開芍藥城中花市花滿肩城外
人種花爲田花田寸寸皆金錢五穀無年花有年花闌短短

花檐長卍字屈曲迴文方遊人面面迷花光十里五里蜂蝶
忙揚州芍藥稱來古香豔曾傳宋人譜惜無人畫堡城圖當
日花田在何所有田不栽黍與禾揚州田少花何多花不可
餐當奈何

小忽雷歌爲繼蓮龕觀察作

并序

長二尺許牙柱二竝在右上刻孔東塘詩二首項下刻建
中辛酉臣滉製進八字又篆書小忽雷三字按建中唐德
宗年號滉疑韓滉時爲江淮轉運使然樂府雜錄羯鼓錄
皆云文宗朝內臣鄭中丞物中丞以忤旨投河梁厚本接
得遂以爲妻後於花下彈琵琶爲黃門所識召還宮云云
距建中近五十載意滉所進至中丞乃顯歟

小忽雷臣滉進項曲輪員木堅潤上鐫建中辛酉年滉正江

淮作轉運封藏卻到文宗朝冰絲始得中丞調終憐祕器無人見空有妙響干雲霄一朝隨流出金屋花下偷彈供奉曲芳名從此畱人間載入南家羯鼓錄萬物顯晦由因緣知音不遇終不傳君不見玉奴絃索冠天寶邏迤檀槽來蜀道君不見橋陵故物名玉環賀老段師才一彈繞殿雷聲歇千載依稀尚有脂痕在倘逢妙指發宮商嘈切遺音應未改小忽雷今不朽大忽雷落誰手何日同登大雅堂爲君佐進花前酒往時此器屬東塘曾憑院本譜伊涼孔東塘育小忽雷院本今已不傳流傳翻讓桃花扇猶斷詞人弔古腸

雙忠祠

在梅花書院祀宋李公庭芝姜公才

江潮不來白雁翔少帝銜璧辭錢唐揚州守臣抱奇節制置使李都統姜一片趙家乾淨土城存與存亡與亡糧絕矢窮

尚血戰歸來始覺身已創焚詔斬使示決絕登城數語尤堂
堂散金享士仰天哭四萬義軍同激昂誓奪三宮奠九廟功
雖不就氣益揚沿江列郡盡如此未信敵騎能披猖或於二
公有遺憾謂忠有餘謀不臧誤疑信國作遊說逼走高郵登
海航不然合力斷淮水安見國威難再張赴召東行亦失策
太阿脫手無鋒鋌叛賊倒戈得反噬可憐畢命非疆場寧知
此錯實天鑄事出意外誰能量運移數極信莫挽特爲斯世
存綱常羣姦毛骨朽無迹碧血至今埋蜀岡魂魄有知應戀
此此邦百世宜烝嘗雙忠在古與誰匹張許廟貌畱睢陽

平子歸田圖爲吳山尊學士

兼題

一官不得志高咏四愁詩學洞天文久心傷火德衰思元非
作達應間豈隨時後世誰同調淵明歸去辭

雨中立舟湖上觀荷二首

遊興蒼茫極雙橈剪雨來明珠跳葉響嫩粉滴花開涼翠沈
鷗夢輕香阻蝶媒無人畱戀處真是絕塵埃

此雨田家寶秧歌香靄中水光連岸失人影入花空釣石濃
堆蘚僧廊曲障風南湖千里隔在臨川城南荷花甚盛煙景記差同

瓦松

古屋斜陽冷豔明蒼龍蹙縮隱檐楹垣衣濺雨侵枝潤藻井
揚塵摻葉輕露浴瓦鴛爭翠色風搖鐵馬當濤聲秦宮漢殿
今何有禾黍離離草樹平

唐昭陵六駿圖歌

太原真龍天上躍功臣畫像凌煙閣雲驤電奮廿四人名姓
煌煌載勛爵當時六駿亦奇功與主百戰當羣雄口噴紅光

身汗血霜蹏蹏踏煙塵空平東都乘颯露紫拳毛騶來黑闥
死一青一赤臨疆場夏鄭兩軍同滅亾此皆利鏃穿毛骨猛
氣稜稜更馳突歸來拔箭一長嘶猶誓降兵起病卒特勒驃
與白蹄烏破宋破薛如摧枯身無寸傷比福將事有險夷功
不殊咄哉六馬竝神駿渥水流沙來應運豈惟服駕備天閑
博取三花飛鳳印文皇親贊率更書右相丹青貞石撫表闕
旌功詔後世袞塵不數寧王圖九畹山頭柏城路長風夜響
陪塋樹疑是龍媒驤首鳴神靈控勒騰天去樂章別有黃驄
曲禽敵會傳牛口谷侯斤十驥仍權奇名號不登金石錄此
圖傳刻由高宗贊辭還出殷仲容元祐四年刁玠寫記碑額
者游師雄亦圖拔箭邱行恭事實政與唐書同英主酬庸意
良厚功名終始亦非偶多少銘鐘勒鼎人可憐烹滅同功狗

言志集卷之三
三
荷花生日奉家母泛舟湖上婦孺從焉敬紀三律
畫舫安便勝板輿兒童喧笑繞襟裾樓臺斷處花相續簾箔
涼時扇不如一路冷煙藏翡翠十分清氣在芙蕖平山堂上
凭闌久俯看陽鳥下碧虛

虹橋中鎖綠楊津水色雲光次第新廢圃鶯啼猶有樹長隄
馬過略無塵野花作態如游女池石彎腰學釣人今日湖波
更闌咽正逢簫鼓賽雷神

十年曾此百回過卻算今來樂事多登岸共扶臨水竹稱觴
還借插瓶荷聯船燈火迷星宿夾路香風散綺羅城漏不知
餘幾點一梳明月湛金波

秋窗視藥圖萬浣雲大令追傷其亾弟固田作也爲

題三詩

死喪詠孔懷鶴原已長慟桐陰覆客窗每憶秋燈共艱難望
兄貴那及分清俸年年蟋蟀悲悽絕東坡夢
兄勞弟贊襄弟病兄愁惻滄波隔祖洲神藥安可得豈曰無
蓂苓誤投反見賊孝肥而禮瘦執手慘顏色
咎我見君仲昂昂離山旁哭門屢過訪情竊時在牀披圖儼
如昨宿草嗟五霜炙艾有餘痛爲君重摧傷

明樂安長公主玉印歌

秦敦夫太史藏

玉章方寸篆玉筋文曰樂安長公主蘭金泥色未模糊傳自
前明都尉府駙馬都尉鞏鴻圖賦詩擊劍雄千夫天姻國爵
炳青史八妹投井言眞誣緹帶輝煌金辟邪綰綬初登赤闕
車帝乙歸妹祉元吉日兄親賜簪頭花是時賊勢披猖久玉
葉金枝半摧朽相印方懸賢子腰兵符總入閹奴手須臾宮

闕生煙塵戚晚相看如路人粉侯慷慨獨誓死不愧牙牌親
字親新樂侯劉文炳家同痛哭歸來血漬白戎服酬恩徇國酒
三杯欲挽銀潢力不足天孫早駕鵲橋歸不見黃繩縛柱時
內殿玉棺仍火葬全家骨肉同灰飛此印偶然逃劫運不隨
寶帳珠衣燼亦如朱履落人間石上桃花散紅暈吁嗟乎九
頭倉皇斷螭角帝姬左臂宮中落雖畱破鏡了殘緣誰向娥
臺弔徽姬

自夏徂秋陰雨過半雖三伏不知有暑率成十六韻
紀之

夏令今年促炎威五月收火雲都化水梅雨直迎秋屋漏涓
涓續庭陰漠漠浮嫩苔淡鎖徑遙柳暝侵樓漸覺商飈起難
遮霽景畱葛衣晨坐怯筠簟夜眠愁豈有林塘繞居然洞壑

幽花濃常帶淚竹勁也垂頭海月高猶溼天河冷不流星稀
螢爛漫日淡鳥啁啾避暑孤良會占晴補勝遊酒涼雕玉琰
煙隔采蓮舟地衍江淮合時和草木稠無人冤蝎虎到處走
蝸牛久已捐團扇因思買薄裘由來悲宋玉況是客揚州

題棟亭圖四首

并序

康熙中內府漢軍曹君董三官江寧織造手植棟樹於庭
已而其子荔軒繼宦於此因作亭而寫圖焉韓慕廬先生
爲之記今藏黃閣峯員外家荔軒自號棟亭後爲兩淮鹽
政

支茜園淡絳雪飛當年初點使臣衣登樓印綬傳佳夢重見
郎君帥武威

亭外花風信欲闌流蘇宮紫散春寒可憐博得韓宣譽畫入

冰綃更好看

東郡趨庭事已陳一株長殿秣陵春
婆娑料得無生意送過曹家兩代人

比似甘棠已百年洛陽忠孝至今傳
千金自買姚黃貢不費官家少府錢

咏菊

日澹霜濃色愈新黃金端合鑄花神
未饒月桂司秋令只許江梅步後塵
萬物伊誰榮晚節重陽因此算佳辰
莫將隱逸專相比彭澤安陽兩化身

從胡果泉中丞往金陵夜中渡江至新開河得二絕句

斷霞輕裊萬絲金揚子橋西日未沈
水面晚風吹不縐迢迢

雁影壓波心

星稀月黑渡江來
欲引江潮助酒杯
開府樓船燈數點
不曾照見妙高臺

病起卽事三首呈繼蓮龕觀察

分曹射覆復高歌
未覺筵前熾淚多
才隔一宵如隔世
藥爐煙遶病維摩

小園池館鎮虛明
面面闌干帶晚晴
風起南窗花竹響
聽來渾不似秋聲

新持酒戒不成眠
始信如今夜似年
二十五聲秋點盡
華胥迢遞隔人天

隱仙庵覽古

金陵城北雲樹濃
蓬萊仙監畱化宮
市朝變換閱千載
一梅

兩桂皆虬龍當日高蹤遁句曲三層樓上聽松風暮年移住
積金澗辟穀術與畱侯同棲眞閉影與物絕禪代消息何緣
通新朝圖識出囊篋盛陳符瑞推蕭公青雲白日不覺遠豈
以元鑒矜方瞳爲隱爲仙世莫測但疑宰相居山中我來訪
古坐裴綠似有鶴聲聞碧空道人謂王朴山乞食向何處不得揮
塵談鴻濛林徒雲客尚如此何怪浮生如轉蓬

卽興

雲汀如紙雁書稀每到金陵淚溼衣滿眼鄉人作鄉語分明
杜宇勸人歸

自金陵陸行至龍潭晚眺

人影長於樹日光畱在山筍輿風側側楓岸水彎彎薄袂初
寒裏長亭暮靄間晚鴉渾似客空帶月明還

舟行金壇溧陽道中

橋烏啼過曲阿城已向中江淺處行
草屋煙籠山氣暝蘆灣風捲雪花輕
旁看遠樹知船疾飽拽孤帆恃水平
無數漁樵來盡裏斷橋斜日送歌聲

爲陳曼生大令題瀨上石民圖冊

并序

圖列九石一忠義石在溧陽郭北雙橋二郊壇臥石在城外三蒼雲在平陵書院後圃篆刻蒼雲二字傳爲宋高宗筆四獨立不懼四字行書無名款類明人書在縣齋拜石山房之前五玉璫龍六松丈人七小研山八廉石九芝雲凡九石自忠義石外非花石綱之所遺卽宋丞相趙葵園林中物也後五石新自都閩射圃移置平陵書院友石齋前

我來拜石山房住一石端嚴對庭樹石緣有德石不孤此外
雲根出無數城東廢圃屯蒼雲上刻光堯雙篆文先時幸脫
朱勔手不與良醫埋煙氛尙聞郊壇有臥石趙相園林此遺
蹟雙橋忠義名最高十丈嵯峨照晴碧其餘五石竝奇古半
出荆榛半塵土移從射圃置講堂石不能言應色舞我爲九
石慶遭逢各還面目開心胷同入使君圖畫裏墨花更比苔
花濃米老研山猶不朽清風況比鬱林守品題畱與萬人看
五岳眞形復何有愛民如石民不欺以石爲民君不私我作
瀨上石民詩他年九石皆穹碑

吳中三君子畫卷爲曼生題

自晉吳中多畫史名家近數三君子滿胷奇氣成煙雲值得
千金買一紙卷中意態各神妙師法雖殊實同調由來筆墨

關性情知是三君自寫照方君蘭士委蛇鴛湖上奚君鐵生傲骨
西陵葬千巖萬壑通杳冥兩地精魂相跌宕王君椒老臥玉
山顛閉戶自飲山中泉二君已矣獨君在我欲爲放吳淞船
陳侯舊與三君友幾度花前戰文酒我今見畫如見人此畫
此人同不朽

手線縫衣圖爲陳仲恬題

慈烏繞樹飛遊子天涯歸上堂拜慈母下堂脫征衣母今不
可見但見衣上線線短復線長淚痕千萬行線長復線短寸
寸足腸斷養母須遠遊思母還歸休咎歸乃暫別今歸成永
訣試問遠遊人何人不泣血舊衣藏箚中新衣非母縫寫圖
寄哀慕風攪圖中樹身暎心長寒此圖爭忍看養親孝子義
思親孝子志志義誰能兼錢唐陳仲恬

京口阻風

夜泊銀山嘴風隨柁尾斜凌晨當徑渡不暮可還家忽忽吹沙雨幾幾阻浪花歸程原莫算門外卽天涯

祭竈十二韻

癸亥曾作祭竈五言古詩茲吳穀人祭酒於十二月廿四招爲消寒會以此命題故復作之

五祀原兼竈千家各自神登天寧幻說合土是分身每日薪傳火終年甑免塵饔飧惟爾德祭享及茲辰綠爇煤生易黃衣紙動頻呼名疑近褻寫貌若爲眞罪福憑君訴庖廚愧我貧曾無羊可割尚有酒堪陳卜鏡愁行夜明燈任達晨湯差能避客熱幸不因人臘粥停甌冷春幡映戶新且畱餘餽在還欲請比鄰

小除

幾竿修竹幾叢花
又與恩恩遣歲華
飛雪滿天門獨掩
蕭閒
今日有誰家

青芝山館詩集卷第二十二

臨川 樂 鈞 元淑

古今體詩

癸酉

初四日立春庭中素心蠟梅始開

蠟梅乘臘開萬樹東黃膩小院餘一株絨情待春至地僻寒較多花遲品原貴憑闌聞妙香不帶冰霜氣

人曰微雪宴集秦敦夫太史五筭仙館

消寒第三集

銅獸氤氳綵燕飛周遮鏡檻隔寒威燈繁似覺花成海酒暝無妨雪點衣澤腹尚堅魚臚貴土膏將動菜芽肥憑誰畫出城南客筇竹相扶上翠微

仿作漢建初銅尺歌

非序

慮僦銅尺建初六年八月十五日造康熙中孔東塘得之
江都閔義行家今藏曲阜漢陽葉東卿志說用日本銅仿
作三枚一贈翁覃溪先生一贈阮芸臺侍郎覃溪先生因
爲作考并製長歌承以拓本見寄索詩因成長句竝徵消
寒會諸公同作之

古尺皆短今尺長尾絲指黍難料量慮僦漢尺合周制一十
五等俱可詳文曰建初六年造閔家故物歸東塘東卿洋銅
更仿作豪髮不爽曲阜藏木畫紫檀遜堅介紅牙銀寸無輝
光分贈蘇齋比金錯不枉瓊瑤爲報章古人審度爲樂厯積
算不得差鍼芒漢初文物有未備正時協律自武皇建初天
子亦令主氣調時豫多休祥厯用四分定弦望樂行十月和
陰陽要爲漢厯漢樂耳寧與蒼姬相韻頌其時王律出冷道

此尺亦鑄臺山旁彼爲官尺此疑否官尺較此仍微強後來
荀勗校七品稽古徒煩著作郎始平銅尺未出世阮咸神解
通微茫乃知人心有準則能剖纖末分低昂自秦變法亂天
紀度量不同規制亾渾儀樂書判其術布帛營造區以方考
核流傳賴儒者變通損益由時王亦唯師意不師迹但適於
用均爲良

聖朝制作侔造化酌古建中垂典常宮縣上足掩六代勾股
旁可參西洋亭育八埏就軌物率由萬世無愆忘我於古器
百無觀見亦不識徒傍徨家有一尺具十寸祇供婦女裁衣
裳我師博古乃嗜古金石文字森琳瑯使車咎駐聖人邑禮
器獲觀夫子堂此尺曾經對衡鑒英青寶氣騰珠囊茲寄新
詩及拓本墨花豪彩交煒煌焉用鰕生更鳴舌續歌聊爾搜

枯腸

江上望春

揚子橋邊十萬家家簾幙捲晴霞鴨頭水綠江初漲鶴背
天青日未斜酒市揭帘招燕子漁舟停槳待桃花春風卻在
紅闌外滿地濃煙茁草芽

九九消寒詞九首效李長吉十二月樂詞

一九

上中十一月十九日至廿七

蘭射干生陽氣蘇五星絡月熒珍珠寒娥夜倚繡牀倦幾日
日長添繡線霜漸成花雪作片朱門埽徑張華宴書客相呼
提楚醪不愁凍墨膠銀豪楊花茸茸鋪硯槽

二九

廿八至十二月初六

廣漠風來淹一旬銀冰皚皚光射人石丸走地催烏輪天根

又起蒼陽雲白檀燒爐香炭紅滕六不到三陽宮
薤菜仙人會仙友分與流霞一杯酒吳娘大似羞
寒花長袖藏軀裏纖手

三九

初七至十五

萬戶鏗耿鳴臘鼓儺公佞子跼煙舞鵲巢高占
東南枝笑爾羣雁迎北飛風吹色籬響簞策熏籠
撥火煨丹橘挂壁寒山亦蕭瑟醉揭西簾驚晚霽
瓦溝玉花鏡窗紙竹偃梅僵扶不起

四九

十六至廿四

肥冬過來月重缺兩日新交大寒節羅衾徹曙冷
於鐵火星無燄吹不熱埽屋餘塵接輕霧斜暉飈
飈散江樹燕支蘸筆含春風三十六點梅花紅

五九

廿五至癸酉正月初四

初四立春

竈神上天騎竈馬玉皇曉躡香霏下急景倉皇赴除夜粃盆
蕢燭光闌珊此時人間人始閒爆竹千聲雲滿地花釵更插
迎春髻歲尾年頭消酒錢壺中換出青陽天

六九

初五至十三

盆山欲茁菖蒲芽花信已報櫻桃花七八穀逡巡過東風
盡剪池冰破斗帳畫屏交暝香綵人門舞雲衣裳紅樓參差
豁蘭牖十里河隄插楊柳

七九

十四至廿二

雲開節後人蹋歌鼇山戴雲汨金波東打旋羅西拔河珠填
翠壓肩相摩天穿未補愁雨多西廊候月呼嫦娥連宵桂燭
烘城曉萬屋霜華淨如掃樣樣凍雀話春好

八九 廿三至二月初一

粉雲香霧相迴復釀出煙絲草痕綠瑤笙吹喚秦女臺一索
秋千動鳴玉膽瓶咽水猩紅嬌狸奴不上錦羅眠臥酒吞花
一月盡青旛夜拂珠杓旋城北城南飛紙鷁

九九

初二至初十

桃花欲笑春有情蝴蝶過牆招踏青綺陌泥乾粉汗溼羅襟
作扇背闌立荏苒蘭時欲將半遊絲娟娟學人嬾一犁新雨
四山雷牛背生雲鴨波暝王孫齊脫貂裘天晴不晴爭出
遊叱撥馱人登綵舟

餞寒詩

陽谷與幽都羲和判所宅太皞旣東來元冥退爲客遷延近
四旬霜雪乃斂迹代謝有常期陽和詎相迫自從水始冰肅

氣日凝積萬物皆閉藏頓疑天地窄焉知凜烈威實寓育噓
澤故色還松筠潛功孕牟麥昨驗九九圖畫梅無賸白燭龍
驂翱翔去與金烏隔典我青髓裘買尊酹江陌薄暮臨高臺
迴風猶策策

春雨

竹屋朝來響梅窗晝亦關屐聲喧巷陌花氣溼屏山草壓牛
衣重泥侵馬鋏殷流鶯歸樹早遙伴酒人閒

法雲寺謝太傅手植雙檜歌

姑蘇弟一集

法雲寺中兩檜樹植自晉時謝太傅枯槎已朽寺基平空賸
雙龍攫雲處太傅有姑名不傳出家曾住那溟邊此姑旣比
道韞長此寺當在新城前公鎮廣陵築新城召伯一隸由公
名召伯甘棠勿翦拜公之手澤人應愛何年野火燒蒼苔雖

有雨露無根荻白雞夢殘金鼓破千載同傷梁棟材想當左
紐成文日風色冥冥翠煙密蓮臺奈苑劫塵飛天女先離散
花室石子岡頭宰木寒庭階玉樹亦凋殘六朝故物青山在
甯與今人挂頰看

效漁洋冶春詞九首

落春第一集

花朝已過又新寒雨更漸漸雪未乾風信枉教梅第一早將
春色讓盆蘭

連日看雲嬾出城愁心寄入遠鐘聲石根幾種無名草綠到
人邊似有情

常笑春人信自癡不愁春短怕春遲花開便不禁風雨試問
金鈴合得知

燕子忙時午院閒春光猶在有無間樓頭一片煙嵐色青似

江南弟幾山

天寧門外早鶯啼
風引垂楊綠向西
正是遊人相見處
畫船搖傍錦帆隄

野水揉藍色未勻
春陰濃淡隔城闌
輕雷夜落雷塘岸
喚起擔犁叱犢人

金鼓從容尾鈿車
少年喧笑說繁華
尊前老輩翻惆悵
不見蕃釐觀裏花

九子萍開水欲波
隔煙隔樹有笙歌
背人選得凭闌處
一蝶如花繡綠蘿

社日停鍼一事無
閨人閒打遶官圖
牙籌賭得金釵轉
忘却香消鵲尾爐

讀法苑珠林用淵明讀山海經詩韻

吾道本淡泊法網亦時疎史遷疑報施況乃喻比廬三生示
因果賴彼毗尼書精旨收上智載以大牛車中材難譬曉戒
殺令長蔬懾心入善域亦可聖賢俱梵筴要粗迹半出龍華
圖傳燈在慧照庶用契真如

陶公運甓行

嬉春第二集

壁間織梭曾化龍振翼夢登天八重八州都督長沙公乃以
勤敏成英雄自言分陰足可惜身作貴官猶運甓好勞惡逸
豈人情他日中原須致力中原未靖身已亾老子婆娑心自
傷朝士清談正捉麈笑公平生何太忙

廖復堂都轉重葺題襟館招客脩禊分得無字

使君清暇禮文儒木筆書空雨似珠地占煙花三月好人言
稌飲廿年無補栽竹樹如生客流寓江淮賸故吾爲報舊時

曾子固

謂寶谷方伯

高齋重畫宴賓圖

吳穀人祭酒招同繼蓮龕觀察張船山汪劍潭兩太守集安定書院郎君小穀與焉分得人字

物外無窮達尊前忘主賓文章皆巨手風雨此閒身花落春猶壯燈淡夜轉新酒人難便得況是素心人

三月十三日復集題襟館分得諳字

文館追陪一再三敢將常語佐英談酒如名士難輕對花是幽禪要靜參令節已聞唐代展唐開成元年改十三為展上巳逸詩何止晉人諳揚州從此添佳話傳過江南復劍南

浴佛日鄭秦川舍人

宗洛

邀集義實堂看牡丹分韻

得盛字

佳日因佛傳名花以緣應來從香國遠現此色身淨逢時雖

稍得氣乃獨盛疑爲造化私不受春工令樓臺七寶成衣
服五銖稱富若有三歸榮如邀九命穠華非世妝姿媚亦天
性繡毬難與友紅葍甘爲腴猶令神女差差許謫仙詠賓客
繼西京園林推北鄭蝶使正迎門風姨先埽徑才誇鳳閣新
會比龍華勝散馥通晶簾飛光入瑤鏡都疑月府遊各有霞
漿與彩雲停不飛華日淡相映持此奉金仙聞香應出定

次日黃閬峯員外

文卿

程也園郎中

振甲

復招集沁

春樓觀牡丹分得開字

昨日已傾竹葉杯今朝復酸葡萄醅春歸底事日洪醉爲有
國豔攔春回紅嬌紫姹浩無數但覺錦繡鋪成堆就中數叢
更殊絕顏色乃兼桃李梅姚黃歐碧世未見不知較此誰爲
魁造化隨時弄新巧廬陵舊譜寧能該傳聞此花孕秋仲女

夷斂氣相胚胎春工亦爲出全力時以輕陰籠綠苔雕霞鏤
月費時日東風雖急難翦裁穀雨過來未破萼遲迴似待櫻
廚開百寶闌前絳妃笑九華燈裏瓊仙來妝成未許口脂汗
香發何煩腰鼓催始知萬卉盡寒瘦先期退縮如輿臺是日
流雲蕩空碧琉璃世界無纖埃夜歸不寐恍如夢夢騎舞鳳
登蓬萊羽衣使者授彩筆欲賦恨少元興才餘香三日貯衿
袖尚有蛺蝶來相偎

題畫蝴蝶

一片嬌黃是蝶衣如仙如夢兩依稀韓憑已爲相思瘦須揀
春風冷處飛

舟隱圖爲黃竹雲秀才

盛修題并序

嘉慶丙寅夏五竹雲於江上逢操舟叟意度甚殊異而問

之楚人也遭白蓮教之亂全家失散子身來江南以操舟爲業邀之共飲飲無算爵語竹雲曰子他日可有爲然當難進易退勿忘也贈竹扇爲別不告姓名而去叟殆讀書志道之士歟竹雲於是爲作舟隱圖而吳穀人祭酒序其事如此

聖代江湖無隱淪隱於舟者伊何人相逢不肯道名姓楚聲哀怨如靈均家世三湘逢寇亂妖氛旣靖妻孥散孤舟蕩入廣陵潮潮落潮生夜復旦可憐白首身無歸意氣反比他人奇心識黃生才有用贈言侃侃相箴規進退之間勿草草此翁此言良有道可知出處久權衡不是無聊耐窮老窮老如翁心自閒十年薶照風濤間酒邊偶話平生事忘卻月明江上山臨別殷勤畱竹扇中流一棹去如箭重來但見白鷗飛

飛入江雲看不見

和屠琴臨種桑詩三首

眞州非舄鹵田野何荒蕪舊俗工織紵

見太平寰宇記

今無桑一株

衣食衆所急古今寧有殊鹽筴利游惰斯民忘本圖閭人事
鍼耨所博徒錙銖河干埽棄鹽反足供時須因茲棄女紅逐
末隨丈夫焉知有神木葉葉皆衣襦富者固可衣貧者兼可
餉其功況易畢仍得營其餘奈何守曠土爲計毋乃疎長官
亦任咎非盡民之愚

課桑本利民民信亦有以子產驟行之鄭人且謗訾民情樂
觀成難在與謀始爲政有先聲久之乃易理屠侯下車來事
事順民旨前年教紡織下令如流水其事掌於官爭趨尚如
彼況茲本本桑樹蓄在田里畱貽到子孫誰復憚經紀民志

自此定民風當益美靡食而媮衣俗誇今則恥桑者何閑閑
相逢歌樂只

屠侯家浙西蠶事最所熟桑田遶其廬桑葢歲盈斛頃來攜
到官分種一州足一年桑根生二年桑葉綠三年復五年宛
宛蔽牆屋春淡蠶勝來蠶繭各成簇煮繭還纒絲萬家鳴杼
柚從此眞州民資生恃羅穀貨泉出廢壤厥效亦云速此邦
旣宜桑豈不宜菽粟力耕盡地利瘠土皆可沃勤劬在良氓
勸課在良牧

竹醉日雨

麥秋逢久晴竹醉值新雨凌雲氣暫低望澤心原苦庭院走
風雷此君更起舞爲感造物仁分膏徧禾黍

閒園二首

不到閒園漫五年
薔薇花態尚依然
舊時架上含風笑
今日垂梢水閣邊

新紅幾點未知名
醉露愁煙似有情
說到飄零都可惜
也須著眼看分明

雜咏五首奉寄百菊溪制府

輪囷衡岳雲浩漫
泰山雨雲能頃刻
開雨亦崇朝
溥磅礴既無心
鴻濛況有主
萬物不相喻
紛紜疑錯迕
燥溼各時陰
晴遞相輔
安得凌虛人
周遊告下土

昆竹作長笛
聲如鸞鳳鳴
江天發奇響
終使蛟龍驚
朱絲絃
槁木緩濁急
復清臨風偶一奏
聞者心和平
至音而異器
感物猶殊情
季長與叔夜
兩賦誰分明

銀潢亘碧霄
狹處容一葦
星辰渺相望
勢若千萬里
羲和駕

奔輪晝夜無停軌穹圓同轉旋豈限盈盈水鉅細不同量功
能固難比象緯何煌煌無由窺化始

春鳥足歡怡秋蟲足感歎夏蟬與寒鴉乃使衆耳亂躁擾匪
天倪喧囂趁日旰露重霜復嚴繁聲始各斷尙僕能施竿王
孫正挾彈曷不靜羣吹軒庭永清晏

嗷嗷隨陽雁啞啞返哺鳥側身望空野展翅皆窮途鳳皇在
雲中下視爲嗟吁竹實亦無幾安能飽羣味物生貴自養胡
乃昧身圖飛鳴復何爲戢影還菰蘆

新秋苦雨五首

雨氣成山立秋光似海淡遙情階下草古意匣中琴樹暝鴉
如醉天低雁欲沈西風時一吼無力破頑陰

不道黃梅信今年復到秋衣書痕已積牆壁汗仍流盡日蟲

雷動何時屢霧收傳聞湖水滿漸欲灌平疇

佳客阻相過終朝常掩扉雨多螢出早花少蝶來稀暗暈欺
明鏡新涼犯衿衣水雲吹已薄猶蔽月輪飛

羈人愁對雨杜老句尤多

杜集雨詩凡三十餘首

讀畫憐山色臨觴訝

水波燈昏頻費剪墨輒驟難磨卽事成迂滯放懷聊浩歌

偶晴如夢醒雙眼尚迷離坐向日斜處愁生雲起時朝窗原
自溼夜榻又將移太覺黃昏易還令歸燕疑

追和曾賓谷方伯嶺南壬申中秋見懷元韻二首卻

寄

夢冷秋將半愁長夜未闌舊遊餘杜牧名論憶桓寬海月吟
來遠江花看又殘南荒炎熱地高處亦清寒

近寄新彙集兼分積俸金承蜩惟信手養鶴重關心鏤德無

嘉玉絃詩有故琴蜀岡舊栽樹猶自作濃陰

信貞嬪詩

附汪孟慈喜孫所撰傳略

信貞嬪諱懷瑾江都閭某女幼通敏工詩古文詞善書人
歐陽率更之室適信氏數月夫歿撫子成立取婦季未久
子亦歿族人構難遂毀其家晚年畫蛺蝶以自給婦季亦
工繪事一時人竝重之乾隆初年歿既久遂無知其名者
信家貞嬪名瑾懷閭相之裔賢而才頌菊銘椒播芳譽茹荼
食藥銜苦哀嫁得藥砧曾幾月寡女琴絲悲斷絕遺孤還贖
未亾人兩世娉孀同泣血暮年家破餘清門但倚紙筆謀蔬
殮摹盡滕王圖上蜨可憐不返青陵魂璫篇繡句銷無迹妙
繪猶爲人祕惜更傳楷法繼歐陽一紙定可千金直由來才
士多失志巾幗有才天更忌君不見曹家韋母皆斃幾千秋

幾箇管仲姬

劉烈女詩

附孟慈傳略

劉烈女寶應劉準女劉故望族烈女早失恃許字應氏遂育於應事舅姑以孝聞未婚壻銓病劇烈女割股和藥遣婢以進未幾壻歿經三年舅姑憐其少謀於女之父將嫁之女固不許卒定議女乃縫其衾衣加素服投水以死事在嘉慶十五年邑人請旌於朝

女生有父俾從夫女幼無母歸舅姑夫雖早死未成婦舅姑之恩同父母義或可去身必畱代夫爲子義乃周厲貞於孝事曲折女亦何知但情切久依舅姑那忍別一朝遣我何決絕舅姑不諒父不哲死孝不成乃死節吁嗟此女斯爲烈女當夫病危迫時割股藥夫人共知事舅事姑又三載豈視往

時有更改女身既死心始明射陽湖水千年清勒石其門
詔所許應銓之室劉氏女

題晉酒人圖後

并引

張風白描長卷前畫竹林七賢中一人抱甕據地酣寢蓋
嗣宗也最後復畫一人獨立遙望不知何人殆風自寄其
意歟風自題畫上云嗣宗不飲一旦痛飲痛飲之後遂戒
飲焉戒飲而復有事於飲嗣宗豈真好飲者哉不過藉飲
以發其胷中之奇氣已耳云云凡一百廿四言語頗詼詭
後署上元老人戊戌十二月廿五日及觀字欵白文鈐印
曰張風之印書法絕類趙松雪屠琴塢購得之題曰晉酒
人圖云

詩人常嘯嘯酒人常放浪卓哉賢達人詩酒特皮相典午繼

當塗權姦學禪讓網羅當世才盡以浮榮誑高流誠恥之或
又傷矯亢阮公殊不然一任天懷曠朝陪公府宴夕趁鄰家
醺酣適避國姻浮沈息眾謗拉雜咏懷詩依稀采薇唱其旨
雖遙淡其音實悽愴全真復全身遠出中散上妙用神龍如
丹青孰能狀張生灑醉墨意態何佚宕曾不削山王爲公傳
雅量何人附紙尾獨立遠相望知君有淡情於此寄微尚要
之市朝隱未若林泉暢盍師李伯時更寫陶元亮龍眠有高士圖畫陶
徵君歸後像也

晚望

一片仙雲下太空悠然正共此心同長川杳杳秋光外古木
明明夕照中客子行依山曲折人家住夾水西東久閒忘卻
今何日但見吳天月似弓

再和綠春詞三十首

并序

管羈北平遙寫南部意因詞果鬥靡時賢爾來廿年年近
知命才穎益退思泉將涸欲因側豔之體以潤槁枯之腸
乃取斯題和如前數嗟平身若輕塵家同漂梗聽黃鳥而
思邦族履清霜而驚時序老之將至何所適歸我歌且謠
政復難已譬之蛩蛩感露自然吐音松筠被霜不忌發翠
於是悅吟魂以芳草寄愁心於碧雲搗藥花天吹香墨海
雖復魯直豔歌見訶於法秀太虛麗句取哂於遺山良有
惡焉不遑恤矣若夫事之泡影仍等曩篇知我有人無足
多辨

銀漢西流不向東女牛雙影水光中
年年灑淚成秋雨夜夜分愁寄曉風
少日過同飛電疾情天賸有夕陽紅
何須更覓

遊仙枕夢醒僧樓鼓一通

情關原鎖一千重不奈情魔處處逢
秦女來時如紫霧湘靈去後只青峯
琴於夜鼓聲逾遠酒以春名味更濃
十二樓中誰好在玳梁多被燕泥封

欲采芙蓉怕涉江有人先泛木蘭艘
青奴抱節辭珍簟玉女防嫌閉瑣窗
檐下鸚呼郎自怯鏡中鸞舞妾誰雙
黃驢那得輕相取須要買紅纏酒缸

補桑東樹有西枝一霎晨光判早遲
至死難忘拋去事相思已負過來時
中山酒爲澆愁買北里笙常帶恨吹
杜牧溫岐都老大更無人賦惜春詞

玉斧徒傳侍紫微金漿色好味全非
雲中竟自騎鸞去月下空教伴鶴歸
閬苑峯高桃實小天台洞鎖藥苗肥
人間行樂

須臾事頭上雙輪迅似飛

垂髻覆額乍勝梳細骨輕軀可步虛
荳蔻含胎先吐穗薔薇著刺使牽裾
蘇家簡簡馳名早張氏紅紅記曲初
愛聽吟詩看作字慧兒真慧更知書

愁怕人知病要扶爲誰消瘦玉肌膚
試情聊索楊公壁論聘何須石尉珠
錦字傳心應不假金夫到眼只如無
崔盧莫漫誇門戶爭及朱陳嫁娶圖

冶遊初出路全迷複閣重廊夾大隄
攀柳燕隨風上下采蓮魚戲葉東西
羞擎綵扇遮星靨怯避青驄響月題
女伴有心看過客相攜畱待夕陽低

落梅和雪糝銅街餞送仙郎與計偕
賭采伴輸金葉格締緣私贈玉香鞵
離杯未肯淡淡勸去路難禁渺渺懷
却問歸期

須幾月可能重話晚涼佳

紅葉紛紛不是媒朱扉閉後幾曾開水淡欲沒千絲網風細
難通七寶臺除卻飛花無影過只應啼鳥有聲來獨行怕遠
玲瓏石比作瞿塘灘頭堆

洗紅紅褪不重新珍重湔裙濯錦人桂樹滿時才算月桃花
開後更無春雨蒸石礎莓苔長風弄金鈴鳥雀嗔嫁得君平
能幾箇試將纖手一回輪

踏春少女亂春雲陌上泥乾草正薰倦遠松寮連榻坐行空
柳路過橋分紅羅壓繡明金履紫綺交龍門鳳裙無限衣香
禁不住遊人多在下風聞

同人一例度朝昏獨解傷心亦慧根小徑隔花成絕塞疎疏
淡月抵長門愁香壓鬢雲無色淚粉凝腮玉有痕蕙姑蘭姊

都情懂每來燈下絮寒溫

夜定姮娥閉廣寒霓裳妙舞不教看矇矓倦眼驚紅燭曲祿
離腸寫素紵暗露滴時鴉夢冷頑雲低處雁聲殘更籌且莫
催天曙來日須知更大難

消盡沈煙冷博山鏡臺常掩繡綳閒牀頭蟾子綠空幕屋角
狸奴避小鬟乍暖乍寒三月底無情無緒兩年間昨遊遺卻
香羅帕幸遇蕭郎與送還

春庚秋蟀送流年好夢無多況不圓驛路求漿原偶爾江皋
解佩亦徒然纖來蜀錦難成匹學會秦箏已絕絃莫道如今
腸始斷斷腸先在碧瑤天

昆命不敢盜紅綃淡院何能遣使邀但約看燈遊月地還期
撲蝶會花朝纏絲意結雙盤帶鳴咽聲傳一管簫眼裏繡幃

空咫尺香塵一碾便迢遙

金錢爭向綺筵拋酒冷燈昏履舄交只道柔情方繾綣誰知
芳意久蕭梢愁邊車馬春春開夢裏鐘魚夜夜敲莫訝杜鵑
啼不已千林難揀一枝巢

宴罷歸來月已高相畱更爲設香醪搔頭華髮慙恩御照面
凝缸故故挑玉漏正催還客館金針誰替補征袍天明便合
登舟去何日瓊瑤報錯刀

記拍紅牙和怨歌翠眉生暈臉生波滿橋折柳春風遠蜀道
淋鈴夜雨多一別埃塵昏鵲鏡中年絲竹感鶯梭可憐流水
無情物嗚咽聲聲檻外過

書仙琴客半無家少小隨人住狹斜暝日屢催繁杏萼淡泥
仍長妙蓮花窗櫺紙破無妨補門巷塵多未可遮好向苧蘿

邨裏去洗妝長浣越溪紗

浪傳有洞號迷香轉過屏風是曲房任對晚花浮大白祇容
明月照流黃鳩媒失意徒相謗鷗侶聯盟也未妨豈比蝦蟆
陵下女琵琶抱向冶遊郎

經年不見黛眉橫願託飛鴻與寄聲豈有神方畱稚齒更無
多語慰遙情抽身自合千般急擇對仍休一諾輕頭白鴛鴦
才可羨解人端是玉溪生

一片涼天雨過青焚香讀罷蕊珠經閒將鈿尺量花影戲捧
銀槎渡酒星慙慙儘教諸姊笑密談終恐侍兒聽檀郎去後
門孤掩竟似神仙洞府局

柳昏花暝一層層眞箇消魂總未曾每爲泛湖同畫舫并綠
賭酒共紅燈送鈎玉腕常私握讀曲香肩亦屢凭此外更無

親切事伊如白雪我清冰

江水分流更合流綠波宛宛蕩紅樓偶聞吹笛聊相訪因看
投壺爲少畱戲蝶娟娟頻惹扇游魚唼唼待銜鉤此中信是
風流數都忘盧家有莫愁

夢中迷路各追尋君住桐陰妾柳陰近日容華如月減當時
情抱與江深千花幾見成雙帶兩草徒開其一心更被秋霜
摧折了青青惟有女貞林

漸吐芳心倚半酣水窗煙檻背人談爲雲不得寧爲雨采綠
無多更采藍玉蕊開花原第一珠胎應月自初三櫻桃正熟
房櫳悄付與流鶯取次含

戲書名姓作闌干恰值伊人出畫簾鄭曲香盟寧忍負章臺
韻事竟難添碁因一劫全翻局塔要三生始合尖風絮水萍

俱幻相漫將形迹論恩嫌

多情料不判仙凡閨苑書猶倩鶴銜月姊貪遊閒殿閣星娥
喜著豔裙衫愁城霧重宜揮帚愛海風狂莫放帆欲斷塵緣
除綺語心應百鍊口三緘

悲哉行

身後槨與棺不知何山樹身後邱與墳不知何地土身後碑
與銘何人贈言語身後子與孫何人憶祖父謀生亦已癡謀
死良復苦達士遊空虛愚兒戀朽腐悲哉復悲哉千古復萬
古

歲除二首

八旬慈母正康強歲暮渾忘在異鄉婦女商量沽酒果兒童
喧笑比衣裳讀書幸免租庸調奉佛常呼妙吉祥似此年年

貧亦樂全家同燕告天香

草甲重抽綠未闌晴窗幽鳥共追歡黃金射日梅情豔碧玉
凌煙竹影乾每認夜光爲曉色只愁春令補冬寒將來雨雪
還多少細把新年歷本看

甲戌

正月廿三日雪洪桐生太守招集香遠樓看梅一首
座間有赴公車者故次首云然

紅梅開早草抽芽多謝春工轉歲華塵外主人閒似鶴雪中
來客少於花微風瑟瑟搖珠樹大地濛濛覆玉沙卻愧酒酣
詩思窘難將險韻鬥尖叉

都門春色近如何料得盧清水漸波殘月有聲留白雁輕冰
無力斷黃河登樓漫悵關山遠鍵戶空教節序過淮左芳菲

原白足只輸燕地杏花多

歸鶴篇

并序

廖復堂都轉蓄一鶴於題襟館範以色籬偶啓其關一鶴
飛去經月忽復來還主人喜甚屬賓客紀其異爲賦歸鶴
篇正月廿四日

仙人騏驎玉毛羽丹頂未淡作雛語羊公庭下久雙棲的
青田好儔侶誰雄誰雌人莫知一去一畱成別離樊籠內外
隔千里日暮歸鴉飛滿枝碧海青天莽遊戲水寒沙闊無同
類幾度空懷警露心一朝竟戢凌雲翅主人恩重渾難忘且
共故羣分稻梁他時同唳蘭岩月不羨丹山有鳳皇

浴蠶行

花朝日午花叢叢菜花黃白桃花紅揉花浴蠶溪水中預祝

一年蠶事豐蛹以爲母蛾爲父咻咻如馬斑如虎人歸蠶市
月初圓擊鼓焚香祭苑廂陌頭桑葉大於錢羣女鬢邊無翠
鉏版室溫磨璘藉暝辛勤守到蠶三眠吐絲成繭繭成囊家
家軋軋車動願從園客丐華蠶畱與明年作蠶種

題宋于亭孝廉

荆鳳

城南燈火圖卽送其公車北上

銅街繡巷環孤館紅土沈衣無處浣羨君獨下著書簾念卻
日長嫌夜短同遊數子皆俊人意氣相聯蹤跡親今情古義
共商推一點凝缸青徹晨長安歲月最可惜有若奔流帶沙
石車喧馬逐到黃昏風雨打窗塵滿席此味平生已嘗飽少
年面目須臾老看君圖畫始心慙虛負當時煙月好重逢細
話邗江濱惆悵雲泥此後分一語送君還訂約何時剪燭更
論文

春分日大雪

春前已放蜀岡梅春雪今看第五回可是天桃工作態春過一半不曾開

酒市杏花歌

燕子來時紅滿樹五陵年少買春處可憐羞殺當壚人斜倚妝臺暗相妬葡萄醅綠醅黃竹葉梨花都未香春風釀此好顏色醒眼一瞥成顛狂輕如綺縠爛如繡蝶醉蜂酣開晴晝爭馳寶馬趁青帘笑解金貂付紅袖曲江仍是看花時高插帽簷人幾枝孟郊不第劉郎老花下酒人今有誰

洪介亭太史沒逾年矣欲哭以詩久而不成至是爲五古一首

宿草日以多停雲日以積洪崖仙之人倏復委形迹憶管里

選偕豫章同稅宅我病貼危亾賴君屢扶掖

乾隆己酉遷延七月事

獲再生又作燕臺客泊君登玉堂憐我猶射策每欲挽之升

進賢爲己責不才終負負逝別長安陌是年辛未夏君齒周

半百亦有劉翰林

美初

齊年心莫逆醪飲陶然亭良朋半在席

顧南雅謝向亭董琴南三大史董琢卿朱必園兩孝廉

雖爲二君壽離別亦共惜踰月

登歸驂

余與美初同出都

時時念三益君詩清且雄有作墨盈尺言

談無淺淡隨意吐肝膈性情又疎散於我最宜適素精養生

理神貌頗豐碩如何一歲違竟使千秋隔病間寄我書細論

方與脈自言身漸康事事如平昔書到人已亾窗燈閃精魄

仕宦春花紅交遊逝水碧喪車歸未曾已矣痛元伯

曾賓谷方伯自嶺南入

觀道過揚州相晤志喜

別酒乾來竟八年驚看須鬢已蒼然每懷嶺樹思馳馬多謝

江風送泊船

方伯以驛路不便遂道長江九日而至

我輩英靈終會合人間歲

月奈推遷歸旌過此專迎候

方伯擬乞假展墓南城須仍過揚州

重品平山弟

五泉

對雨

昨夜雲開夜色晴朝來簷溜又聲聲天時變換自難測物態
參差還易明向背柳分青白眼淡濃花見淺深情倚闌笑看
閒鶯蝶空與春風管送迎

與賓谷方伯重遊焦山歸成短句四首卻寄嶺南并
呈周南卿

使節經三移客霜亦十度觀河俱面皺山色妙如故小憩自
然庵心清發禪悟幾竿竹便佳嬾到竹多處況復窮躋攀俯
看江水怒君官嶺南久厭見海邊樹我仍腰腳疲意往躬難

赴猶是塵中人暫來卽復去匪惟憚登頓亦恐深戀慕遊興
輸周郎尋詩獨遠步

不作古鼎詩不尋瘞鶴銘二物信奇寶傳來閱千齡遊人競
考辨勒石畱山庭於山反落莫勝處展不停遊山而訪古本
自無畦町徒然事金石母乃遺襟靈焦仙簪隱此雲海同杳
冥眼中復何物但有山色青

詩僧名清恒示我弁山草在笱從君遊如韓遇賈島雪霜堆

半頭世外仍易老時有南昌仙萬梅舉
刺史丈同來事幽討癸亥其
九月

年逾八旬不減商山皓郭生厚庵
中翰未五十奮足緣鳥道老壯

兩難恃至今骨俱槁陸郎祁生
孝廉在京師意氣殊潒倒獨我兩

人來揮豪續前藻同來亦等閒光景幸相保

高軒昨枉過約我赴巖幽 王程豈不速且作半日遊藉非

愛山極他處寧肯畱愛山亦何爲聊以消煩憂君本蓬島人
乘雲睨九州抽閒寄吟賞猿鶴鳴相酬仕隱三十年何異棲
林邱我身幸貧賤蹤跡庶自由江湖笑奚樂旦夕虞奔流茲
遊更匪易還附元禮舟山中或有人邈矣不可求

苦熱

六月之朔三伏初屋前屋後如焚如炎氣忽收色漸淡乃知

有物干陽烏

是日蝕

孟水置庭驗其影銅鉦變幻成寶梳歷一

時許乃徐復依然赤燄歎洪爐江淮列郡久亢旱田土坼裂
禾苗枯流金鑠石殆千里魚暍欲死人曷逋官司禱雨就佛
寺厲禁城市屠羊豬精誠可憐不感格旱魃肆意欺神巫早
稻已休望晚稻再遲米價應如珠陽德主生不主殺雨師失
職難辭辜抑由民氣召災沴上帝怒勅封江湖火雲亦被熱

風埽安望翻墨彌天鋪 盛世偏災詎足患救荒惟恃賢大
夫救日鼓停歎聲作欲逃畏景藏冰壺坐揮羽扇汗如雨敢
看劉褒雲漢圖

奉和覃溪先生重赴瓊林宴紀 恩詩四首

咎捷南宮歲在申今年重探曲江春時周六甲加三載

公乾隆

壬申登第今

六十三年 事足千秋更幾人翰苑綸扉皆後輩經神學海

是前身舉朝慶幸觀殊典晚節

恩榮羨老臣

櫻桃宴上啓黃封拜

賜先沾雨露濃紫陌鳴珂雖蹇緩金門委佩尚從容董生早
歲傳三策坡老奇才動九重諸彥隨公題雁塔正如桃李伴
蒼松

自從弱冠廁鴛班七十過來始賦閒書寫禮堂晨握管鐘鳴
鄰寺午扃關染衣柳汁何曾記簪帽花枝久不攀今日羣仙
齊拱手要公將領上蓬山

四策疲驢達上京羅橫金榜總無名久慙應舉同兒戲祇爲
論詩乞匠成新進又稱前進士及門多有小門生可須科第
傳衣鉢擬逐公車再一行

暑窗雜興二首

磨墨雲浮硯傾茶露滿鐙瓶蓮無垢淨窗竹忘枯榮檐矮風
難入榻虛塵易生兒童俱熱嬾不睡到三更

閉關謝酬酢席地事吟哦心靜炎蒸減身閒逸趣多日初聞
雀鬥花午看蜂過一覺能酣足相親感睡魔